



Dolarisashon komo opshon pa e futuro sistema monetario di Kòrsou i St.-Maarten

Willemstad - Segun Dr. Emsley Tromp, Presidente di Bank van de Nederlandse Antillen (Banko Sentral), mester konsiderá dolarisashon komo posibel alternativa pa e futuro union monetario entre Kòrsou i St.-Maarten. Adopshon di dòler tin su bentaha- i desbentahanan pa e paisnan nobo, Kòrsou i St.-Maarten. Sinembargo, en bista di vulnerabilidadnan di e islanan den e sistema ekonómiko mundial aktual, dolarisashon ta parse mas benefisioso.

E islanan Kòrsou i St.-Maarten a kumbiní ku, den e struktura estatal nobo, nan lo forma un union monetario ku un banko sentral i kompartí un moneda. Sinembargo, e vulnerabilidad di balansa di pago ta obligá nos konsiderá alternativanan di kua dolarisashon ta un. Ya tres di e sinku islanan di Antia Hulandes, esta, islanan BES, a opta pa introdusí dòler merikano komo moneda legal ora nan status nobo drenta na vigor. Dolarisashon ta un mihó sistema monetario pa Kòrsou i St.-Maarten? Tin argumento tantu na fabor komo en kontra. Adopshon di dòler merikano komo moneda legal pa Kòrsou i St.-Maarten ta eliminá e riesgo di devaluashon den un posibel krisis di balansa di pago. Ousensia di e riesgo akí lo promové komèrsio i invershonnan estranhero. Ademas, ekonomianan dolarisá por gosa di préstamonan mas barata den ekterior i ménos gastu di transakshon internashonal.

Un di e desbentahanan di dolarisashon ta ku outoridadnan lo pèrdè e posibilidat di usa maneho monetario pa influensia ekonomia. Un di dos desbentaha ta ku e banko sentral lo pèrdè su ròl komo dunadó di krédito di último rekursu pa su sistema bankario. Ademas, e banko sentral lo pèrdè su fuentenan prinsipal di entrada, esta, invershon di e reservanan di divisa i emishon di plaka di papel.

Por kontrarestá e promé argumento kontra dolarisashon ku e echo ku bou di e régimen aktual di tasa di kambio tambe nos tin un márgen limitá pa hiba un maneho monetario independiente. Tempu a mostra ku ekonomianan chikí i habrí manera di nos ta dependé di polítika fiskal i medidanan struktural pa promové invershon i kresementu. Pa loke ta trata e dunamentu di krédito di último rekursu, introdukshon di un plan di seguro di depósito lo ta sufisiente. Parti di fondonan di un plan asina por bini di e eksigensianan di reservanan koriente.. Pa loke ta trata fuentenan di entrada di Banko Sentral, e mayor parti di e ganashi di Banko ta konsistí di kargo riba kambio di divisa ekstranhero, ku lo sigui eksistí den un ekonomia dolarisá. Ademas, por konservá rentabilidad di e Banko, invirtiendó su kapital i reservanan (inklusó oro) na un tasa mas rendabel, ya ku lo e no ta nesesario mas pa mantené e paridat fiho ku dòler.

Ora di skohe e régimen di tasa di kambio di mas kumbiniente pa e futuro paisnan den Reino, dolarisashon ta parse di ta e opshon mas viabel, en bista di nos vulnerabilidat den e sistema ekonómiko mundial aktual.

BANK VAN DE NEDERLANDSE ANTILLEN
Jüli 2009